

Ogni
can
mena la
coa,
ogni
mona
dise la
soa

Discursi da ostarìa

Carta
canta,
vilan
dorme

Cuotidiano che vien fuori ogni tanto, che scolta, conta e smentisse tuto

DIREZION, REDAZION, AMINISTRAZION, STANPARÌA, VÈNDIA, LUOGO DE NÁSSITA, MAGAZIN: TUTO DA PESSATI

Caro Renato

Walter

Toca a mi el compito de scrivarte. I altri amighi i ga tuti el muso longo parchè i ga vù poco tempo par saludarte. Anca mi par dirte la verità a so sta male, parchè gavivino oncora tante robe da contarse. Na vita insieme dovea finire co do cosiderazion so tuto queo che xe sta fatto. A gavarissino contà de che la volta, da tusiti, ca ghemmo sconto le balette soto tera par l'ano dopo e quando ca semo 'nda a torle a le ghemmo catà tute marze. O che'l di che insieme no gavivino studià e a scuola la jera 'ndà male, spetando i rimbroti de to opà Toni ghemmo scritto la data sol pavimento de legno, soto el divano, in tinelo. To opà Toni, che quando ca perdivino la coriera el ne portava a scuola col 1100. E co i Antenati? Che beo: ti perfezionista e noantri pressapochisti.

Po xe scumizià i matrimoni e l'epoca dei tazebao, chi manifesti dove che a ognuno se ghe disea le soe, li xe scumizià anche la to passion par el dialeto, scusame la lengoa veneta. A no se miga tanto che ca se ghemmo contà del matrimonio de Poldo: na folia, on quarto d'ora de mona che ne ga ciapà tuti, finio dopo in gloria. E dopo, gite in bicicletta, caminade sui coli, opere all'Arena de Verona, par rivare al momento pi maturo, queo de l'Instabile Pessati e del Circolo Culturale Artico. Li co la to spinta, le to capacità e la to determinazione (non par gnente te ieri ciamà "el Cagafati") xe nate le robe pi bele de senpre. Te ghe tirà fora tute le to capacità, on capolavoro. No solo gogliardia, ma cultura, satira, divertimento. Come conseguenza de tuto te ghe fato el sito soa lengoa veneta. E ti, in tel momento pi belo, te si 'nda via. Qualcun pensa che te ghe volesto rivare prima de noantri par prepararne de le sorprese. Atento che ghe xe "on Mestro" pi grande de ti. A meno che.....

AMIGO

de Renato Trevisan

Distante, ma no' importa.

On pensiero riva,
dapartuto.

So che te ghe si,
che te si grande.

Me basta .

Distante, no importa
quanto.

Ma no' dal cuore.

Adesso,
"Tegni dura"
Voaltri



autoritratto

Tra mi e Ti

Tomaso

Mestro, ghe siria da fare do strofete par.....

.....Mestro, ghe xè da preparare el manifesto par la rassegna di filme.

...Mestro, dime come che se podaria alestire la mostra de Nadale .

...Mestro, bone chiè sardele che te ghe fato par la marena .

...Tomasin, varda ca go messo sol sito le copie d'i discursi da ostarìa, a proposito a go quasi finio de scrivere la comedia ca ghemmo da fare stistà de fuora co l'Instabile.....

Stavolta compare te fago fare la parte de la femena...

... Va ben Mestro lo so che te si mato! Pitosto vardame sto articolo chi, te me lo sistemi ti come sempre! Dio sà quanti sbagli ca go fatto!

...Eco, lo saea che te vien da ridare!..... D'altronde par noantri qua de la compagnia el ridare no'l xe mai stà on difeto.

Disea C.Chaplin che " na giornata senza na risata la xe na giornata persa"

... Ti Mestro no te ghe nè persa gnanche una.



Scadenze de Zenàro

Come ogni ano, el 31 de zenàro xe scadù el bolo de la machina e la tassa par la television. Chi che no ga pagà ocore che 'l lo faga in pressa e se fusse massa tardi xe meio pagarla anca co la multa pitosto che riva "EQUITALIA" parchè quei li no i varda in faccia nissuni e le rogne sarìa grosse.

El Mestro Circolo Qulturale artico

El simbolo cà vedi qua dessorà el xe el nuovo logo che conpagnarà da desso in avanti i laùri del “Circolo Qulturale”. Ve domandarì parcossa che El Mestro a lo ghemo messo sol scalin pi alto. El motivo el xe presto dito, cagafati come che ‘l jera no ‘l gavarìa mai permesso de rivare dopo la “Qultura” parchè elo la “Qultura” el la roessava come on calzeto.

A ghemo assà anche “artico” ca no ghemo mai capio cossa che ‘l centra ma El Mestro disea che ‘l “sona ben” e se lo disea elo no se pole discutare. Antonio Pasini che par tanti ani ne ga fato conpagnia so tute le robe che xe sta fate col “Circolo” nol vegnarà desmentegà, ma...te ne scusarè “Toni”, El Mestro xe el Mestro.



El Cecilia in montabai Sicuri de conossare i coli Uganei? Na sorpresa ca no credea

de Jani Raise

Voaltri a podì consultare tute le carte jografiche che esiste, no trovarì mai i sentieri dai numi stranbi che i “disperà” de la montabai i ghe ga dà. Provè a catare fora “el culo del fosso”, “la parabolica”, “la fangara”, “la scajara”, “i scalini”, “el pianoreto”, “la luserna o lucerna”, “el strapeto Ciano” e tanti altri numi che fin a calche di fà a li sentia solo in oataria da quii che li fa in bicicletta. Me xe bastà ‘ndare on par de volte a fare sti sentieri, insieme a du sciopà fanatici de la montabai, par farne na idea e rendarme conto che no ocore ‘ndare in cao al mondo, la beleza la ghe xe su i nostri Coli Euganei. Xe come che te fussi ‘nda distante dosento chilometri e invece te si a on tiro de sciopo da casa. Chi, a Baon, tra Este e Mozeese. Go vù la fortuna de fare on paro de giri, parchè El Mestro el ga insistio, el me ga procurà anca la bicicletta insegnandome i truchi par dopararla, non solo, el me ga fato conossare la pianta “ruta patavina” che pare la cresa solo sol monte Cecilia, e no sempre sul stesso posto. Ghe xe i sassi che i sè sfoja come se i fusse d’i ciochi e, anche questa, la xe na cusriosità de sto monte. Corendo su e zo pa sti sentieri te inpari on mucio de robe. I li ciama sentieri, par mi le xe de le laghe, de i scanafossi, ghe xe stradioi, buse, sassi da schivare se no te voi ronparte l’osso del colo. Te fe on mucio de strada e te si oncora li dove che te ieri pena passà, ma te rivi da on sentiero che xe de traverso a queo che te ghivi pena fato. I me gà anca interogà (El Mestro e Remistani) par vedare se savea ca jerino pena passà da lì e no da tuta ‘nantra parte. Mi no jera, e no so gnancora, convinto che la montabai sia la bicicletta adata a mi, no par la fadiga, ma parchè xe fazile fare d’i robaltuni e spacarse el gropon del colo. E vista l’età, xe meio tegnerse da conto ancora on pochi de ani. Bisogna dire che le xe sta do gran bele esperienze, e grazie ale insistenze del Mestro go podesto vedare di posti da cartolina che no gà gnente da invidiarle ale coline Toscane.

La nomina fata dall’Editore

El “Fondatore” de sto giornale, el gà ritegnù de ciarmame mi a farghe da direttore par el futuro de sto Cuotidiano. Gò acetà l’incarico cò riserva, parchè l’eredità la xe de quee pesanti e i lettori i xe d’i pi fastidiosi che possa esistare. Pronti a criticare, tore in giro e quanto de pezo possa esarghe. Adesso che la riserva la xe finia, go scumizià a fare i conpiti par casa e jutà dal resto de la conpagnia scumiziamo co sto primo numaro del 2012. Xe naturale, che come dise una de le presentasion del giornale “ogni uno el ga da dire la soa”, e noantri dopo femo queo ca volemo.

Francesco

Prevision del tempo

L’ultimo decreto del Goerno Monti dise che bisogna tajare anche sol tempo e quindi smezare le stajon che no le sarà pi quatro ma do, inverno e istà. Tuto par sparagnare. Però i ga assicura che de inverno farà fredo e de istà caldo.